

Antichristi jugo à cervicibus vestris, vestrorumque subditorum: cogitate de abolendis ejus horribilibus idolomaniis, instauranda vera pietate Dei, & imprimis de reprimenda ejus satellitum immani grassatione ac persecutione, qua passim per vestras terras, in vestros, ob veram ac puram CHRISTI religionem sæviunt ac furunt. Tristis illa vexatio optimorum Virorum, vestrorumque fidorum subditorum, quæ ante aliquot annos Justinopoli facta est, scripto publico toti orbi terrarum testata prodiit. Videre ipsi, ac perpendite, quàm talis insontium Christianorum laniena vestram clementiam lenitatemque deceat, & quàm Vobis honorifica sit. Atqui nihil absurdi, aut impii, aut novi docemus; quin potius nihil plane nostrum, aut novum docemus; sed tantum CHRISTI, ejusque Apostolorum auditores sumus, CHRISTI que dogmata, ex sacrosanctis ejus Evangeliiis desumpta, sequimur & confitemur. *Communionem corporis & sanguinis CHRISTI sub discretis speciebus sumimus.* Sic enim filius Dei, Dominus JESUS, verus Deus, disertè eam & instituit, & præcepit. Sic & Paulus Corinthiis tradidit, sic & vetus Ecclesia diu in usu habuit; quorum utrumque etiam Constantiensis Synodus testatur. *Conjugium legitimum Sacerdotibus à Deo ordinatum, Ecclesiæ primitivæ usitatum, & à sacrosanctis Nicano & sexto Conciliis comprobatum, ut tam terra infinita quæ libidines vitentur, concedimus.* CHRISTVM planè nihil in ultima sua Cæna de corpore & sanguine suo, præter communionem instituisse (quod ipsius Domini & Pauli verba clare testantur) credimus, & confitemur. CHRISTVM esse unicum mediatorem inter nos & Deum, præterea nullum, eumque æternam nobis redemptionem unico sacrificio invenisse, quam vera fide accipere debeamus, ex sacris literis discimus, & credimus. Solum dilectum Dei filium audiendū esse, & frustra nos Deum traditionibus & mandatis hominum colere, cælesti omnipotentique illi Patri credimus. Hæ sunt illæ nostræ horribiles hæreses, (sic enim Christi sinceram veritatem Antichristus Romanus impuro ore blasphematur) propter quas Vos pati ab istis Romanis Sodomitis, vestros fidelissimos subditos lacerari & dilanari, an Vobis vel honestum, vel utile sit, etiam